
ЎзА: Жорий йилда Фарғона вилоятида 55 мингдан ортиқ янги иш ўрни яратилади

Фарғона вилоятида 2017-2021 йилларда Ўзбекистон Республикасини ривожлантиришнинг бешта устувор йўналиши бўйича Ҳаракатлар стратегиясини “Фаол инвестициялар ва ижтимоий ривожланиш йили”да амалга оширишга оид Давлат дастурининг мазмун-моҳияти ва унда белгиланган устувор йўналишлар ижросини таъминлаш борасидаги муҳим вазифаларга бағишланган семинар бўлиб ўтди.

Унда сенаторлар, халқ депутатлари маҳаллий Кенгашлар депутатлари, вилоятдаги бошқарма ва ташкилотлар раҳбарлари иштирок этди.

Ўзбекистон Республикаси Олий Мажлиси Сенатининг маҳаллий ҳокимият вакиллик органлари фаолиятини кучайтиришга кўмаклашувчи комиссияси раиси Т. Мадумаров, Фарғона вилояти ҳокими ўринбосари Ф. Қосимов ва бошқалар мазкур Давлат дастурида белгиланган вазифалар ижросини таъминлаш бўйича мамлакатимиз ҳудудлари ва тармоқларда муҳим вазифалар белгилангани, хусусан, ижтимоий соҳани ривожлантириш бўйича тегишли чора-тадбирлар ишлаб чиқилгани таъкидланди.

Тадбирда Давлат дастурида белгиланган топшириқларни ўз вақтида сифатли бажарилишини таъминлашда тизимли мониторинг олиб бориш механизмларини янада кучайтириш, аҳоли бандлиги ва реал даромадларни изчил ошириш, аҳолини ижтимоий ҳимоя қилиш ва соғлиқни сақлаш тизимини такомиллаштириш, хотин-қизларнинг ижтимоий-сиёсий фаоллигини ошириш, арзон уй-жойлар барпо этиш бўйича мақсадли дастурларни амалга ошириш йўналишидаги вазифалар атрофлича муҳокама қилинди.

Вилоят Бандлик бош бошқармаси бошлиғи ўринбосари Рустам Мамадалиевнинг таъкидлашича, жорий йилда вилоятда 55 минг 674 та янги иш ўрни яратилади. Меҳнат бозорида фаол тадбирларни амалга ошириш натижасида эса 34 мингта фуқароларнинг бандлигини таъминлашга эришилади. Ўзбекистон Республикаси Бандлик ва меҳнат муносабатлари вазирлиги ҳузуридаги жамоат ишлари жамғармаси маблағлари ҳисобидан вилоятга 37,2 миллиард сўм маблағ ажратилиши режалаштирилган.

Семинарда Давлат дастурида белгиланган вазифаларни ижросини таъминлашда халқ депутатлари маҳаллий Кенгашлар депутатларининг масъулияти хусусида ҳам сўз юритилди.

Тақдимотларда ёшларга оид давлат сиёсатини такомиллаштириш, таълим ва фан соҳасини ривожлантириш, соғлом турмуш тарзини тарғиб қилиш масалаларига алоҳида эътибор қаратилди.

2019-02-27 19:58:08